

紅爐點雪序

昔黃帝問岐伯曰余聞上古之人春秋皆度百歲而動作不衰今人年至半百而動作皆衰者時勢異耶人將失之耶對曰上古之人法於陰陽和於術數飲食有節起居有常不妄作勞故能形與神俱盡終其天年度百歲乃去今人不能也以酒爲漿以妄爲常醉以入房以慾竭精耗散其真務快其心逆於生樂起居無節故半百而衰夫妄作則傷於形容耗真則

傷於神氣疾之所起二臟先損心腎不交未老而羸
未羸而病病至則重重則必斃嗚呼故上士施醫於
未病之先保養於未敗之日善服藥不若善保養世
有不善保養又不善服藥病入膏肓非藥石所能及
也神哉應圓龔君業則軒岐心則天地囊括文雅著
述成林于斯道得三昧焉憫二豎之爲祟受庸流之
偏執乃出其纂輯痰火一書行世問序於余余閱其
著論立訣靡一不該別門分類靡一不詳未病之先

有養生却疾之術既病之後有調護攻治之法深探
隱微窮盡幻變一團生氣浮於紙上所謂紅爐飛片
雪龍虎自相隨八卦正位二豎消滅將壽世人皆爲
甘穀中老矣

通家弟鄧志謨拜題



北京中医药大学图书馆版权所有

凡例

壽世主人識

一是書綱領大概以水虧火熾金傷議論次以益水
清金降火主治更考諸家本草藥性制方間亦竊
附已意第篇中辭俚句繁不免有醜婦效顰之誚
一是書關鍵大都以脈驗證因證立治由治以定方
耳而其方中之品味一一參考諸家本草必合證
精專者乃贅其不甚精專者簡之

一是書主方後所附葛氏諸方其方中品味皆據所

治諸證一一詳考本草係是方方捷徑味味精切
實猶之將兵也然或有一二味性稍駿駛者卽標
悍之將自有奇能亦願主帥之神用耳第恐夏蟲
之士不能神其神而反致疑勿用故姑摘之以俟
後之孫吳也

一諸方後續附簡易捷方方中多則三五味少則一
二味或獨味者藥品雖簡稽之本草則皆有單騎
獨戰之能況古人所立皆所經驗存案者余故采

而贅之其未經考驗併無醫案者勿錄

一是書方後各採治驗見古人神聖功巧之妙鄙人
千慮一得之見如所謂正治從治之說俾學者深
得內經奧旨而知所變通不膠柱鼓瑟也

一是書所載脈理俱按內經脈訣難經成規並非妄
呈已見以簧鼓後世也學者誠能細心精究則攻
治投劑方能箭中鴈鵠矣

一是書所載本草每品中但取氣味性能切於痰火

諸證者則贅之其不切者不錄恐其厭繁也庶使
醫家目之足以主其見病者目之亦足以釋其疑
一是書所載戒忌却病諸法俱有關於痰火今編入
於後俾患者飲食起居逐款遵行可弗藥而愈矣
一是書總類首之以證論蓋欲學者預知病標本也
次之以證治欲學者如證以施治也三之以辨惑
欲學者邁病無疑也四之以玄解欲學者知病之
隱微也五之以緒言欲學者知脈證之可補不可

補也六之以因證主方欲學者用藥有規矩準繩也七之以諸方捷方恐學者不能自主則目證施劑可捷影響也八之以治驗欲學者知所變通而不泥古方也九之以脈訣欲學者知察病之表裏寒熱虛實安危也十之以五臟六腑用藥氣味補瀉虛實標本欲學者知臟腑虛實補母瀉子之法亢害承制之理也十一之以宜忌偏勝欲令病者臟無傷於峻也十二之以藥性欲學者臨證施藥

無疑也十三之以灸法令學者知拔病根更無煩
他書也十四之以戒忌却疾秘訣使病者逆可致
順重可致輕卽不可起得其正命無枉折之誤也



紅爐點雪目錄



卷一

神集

痰火證論

痰火證治

痰火辨惑

痰火元解

痰火緒言

痰火咳嗽

諸方附

痰火失血

自汗盜汗

夢遺精滑

痰火病脇痛

驚悸怔忡健忘



卷二

聖集

火病結核

肺癰肺痿

火病寒熱

痰火潮熱

痰火骨蒸

痰火失音

火病咽病

火病泄瀉

傳尸鬼症

痰火諸方補遺

卷三

功集

六味丸方論

大造丸方論

痰火雜證補遺

痰火死證

痰火脈訣

五臟六腑補瀉

五臟五味補瀉

臟腑虛實標本用藥式

引經報使

五味宜忌

五欲五宜

五禁

五走

五傷

五過

五味偏勝

卷四

巧集



痰火灸法

製艾法

取火法

定四花六穴之法

千金方論取膏肓俞穴法

論點穴

論艾炷大小

論壯數多少

論忌避

論治灸瘡

論忌食

論保養

擇吉日

痰火戒忌

却病秘訣

終目錄




北京中医药大学图书馆藏

紅爐點雪卷之一



太醫院金谿

應圓龔居申輯



神集

鍾陵 愧璫曾師誠 叅

吳中 二然朱陶性 較

痰火證論

夫勞者勞也以勞傷精氣血液遂致陽盛陰虧火炎痰聚因其有痰有火病名酷厲可畏者故今人諱之曰痰火也然邈所自來固非一類有稟賦素怯復勞



傷心腎耗奪精血而致者有外感風寒傷肺致久咳
絕其生化之源而致者有久病久瘧小愈失調復尅
伐真元而致者有藜藿勞人傷力吐血致陰虛使然
者有膏粱逸士洵酒恣慾勞傷脾腎而致者有薰陶
漸染者種種之異難以枚舉至於成勞則一也然將
成是證必有預徵兆始或頸項結核或腹脇痞癖或
素有夢遺或幼多鼽衄漸而有潮汗遺精咳唾吐衄
諸血等候外證必形容憔悴肌體尪羸手髮枯槁脈

必弦濇芤虛總之臟氣偏虧亢害無制因而致此極也所治之法必審其各臟外證以徵其內亢乃施驅賊補母之法庶得肯綮如肺病傳肝則面白目枯口苦自汗心煩驚怖法當清金補水以益木腎病傳心則面黑鼻乾口瘡喜忘大便或秘或泄法當折水補木以益火肝病傳脾則面青唇黃舌強喉哽吐涎體瘦飲食無味法當伐木補土以益火心病傳肺則面赤鼻白吐痰咯血咳嗽毛枯法當瀉火補土以益金